

## **ՀՀ ֆինանսների նախարարություն**

### **Հարկային և մաքսային մարմինների գանգատարկման հանձնաժողով**

**Ո Ր Ո Շ ՈՒ Մ 58/4**

**30 դեկտեմբերի 2015 թ.**

Քննարկվեց Ա/Ձ Արսեն Ղազարյանի 04.12.2015 թ-ի գանգատը ՀՀ ՖՆ իրավաբանական վարչության պետի 26.10.2015 թ-ի թիվ 1042/03 որոշման դեմ:

#### **Ա/Ձ Արսեն Ղազարյանի գանգատում բերված փաստարկները.**

Արսեն Ղազարյանը հայտնում է, որ 2009 թվականի փետրվարի 3-ից հանդիսանում է անհատ ձեռնարկատեր և մինչև 2011 թ-ի հոկտեմբերի 8-ը իրականացրել է գործունեություն: Նա հայտնում է նաև, որ իր կողմից Մաշտոցի հարկային տեսչությունում կատարվել են բոլոր պարտավորությունները՝ եկամտահարկի և սոցիալական վճարի գծով: 2011 թ-ի օգոստոսի 10-ին Ա/Ձ Արսեն Ղազարյանը լուծարվել է, ինչի մասին ստացել է համապատասխան ստացական:

2015 թ-ի նոյեմբեր ամսին նա ստացել է ծանուցում, ըստ որի իրեն տուգանել են 74.220 դրամի չափով: Հաջորդ օրը նա ներկայացել է Մաշտոցի ՀՏ և փորձել պարզել իրավիճակը, միևնույն ժամանակ ներկայացրել է վճարման անդորրագրերը: Հաշվի առնելով այն հանգամանքը, որ իր կողմից ներկայացվել է 1 անդորրագիր, իրեն տեղեկացրել են, որ անհրաժեշտ է ներկայացնել դիմում, որին կպատասխանեն 10 օրվա ընթացքում: Սակայն 7 օր անց իրեն կրկին անգամ կանչել են հարկային տեսչություն և տեղեկացրել, որ իր դիմումին տրված է ընթացք ու ներկայացված անդորրագիրն ընդունված է որպես հիմք: Այդ պահին իր պարտքը կազմել է 55.025 դրամ, որը նա համաձայնել է վճարել, քանի որ ուրիշ անդորրագրեր չի գտել: Հետագայում, սակայն, Ա/Ձ Արսեն Ղազարյանը պարզել է, որ ենթարկվել է նաև վարչական պատասխանատվության 20.000 դրամի չափով:

Ելնելով վերոգրյալից՝ Ա/Ձ Արսեն Ղազարյանը համաձայն չէ ներկայացված տուգանքների հետ, խնդրում է պարզաբանել ստեղծված իրավիճակը ու իրեն ազատել վերոգրյալ տուգանքներից:

#### **ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.**

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով Ա/Ձ Արսեն Ղազարյանի վերաբերյալ վարչական վարույթի նյութերը պարզել է, որ 23.10.2015 թ-ի դրությամբ նրա չկատարված պարտավորությունները կազմում են 74.220 դրամ, որից սոցիալական ապահովության վճարի գծով ապառք 29.815 դրամ, տույժ 44.405 դրամ:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության

պետի կողմից 26.10.2015 թ-ին ընդունվել է թիվ 1042/03 որոշումը (այսուհետ նաև Որոշում) Ա/Ձ Արսեն Ղազարյանից 74.220 դրամ պարտավորության գումար գանձելու մասին:

Քննարկվող դեպքում Ա/Ձ Արսեն Ղազարյանից 74.220 դրամ պարտավորության գումար գանձելու մասին որոշում կայացվելու համար հիմք է հանդիսացել «Հարկատու 3» համակարգում Ա/Ձ Արսեն Ղազարյանի վերաբերյալ առկա տվյալները, որոնց համաձայն 23.10.2015 թ-ի դրությամբ սոցիալական ապահովության վճարի գծով նրա չկատարված պարտավորությունները կազմում են 74.220 դրամ, որից ապառք 29.815 դրամ, տույժ 44.405 դրամ:

Միևնույն ժամանակ, գործում առկա ապացույցների ուսումնասիրության և գնահատման արդյունքում կատարվել է սոցիալական ապահովության վճարի գծով պարտավորությունների վերահաշվարկ, որի հետևանքով 30.12.2015 թ-ի դրությամբ դրանք կազմել են ընդամենը 55.025 դրամ, այդ թվում՝ ապառք 19.815 դրամ, տույժ 35.210 դրամ: Հաշվի առնելով նշված հանգամանքը ՀՀ ՖՆ իրավաբանական վարչության պետի 26.10.2015 թ-ի թիվ 1042/03 որոշմամբ գանձման առաջադրված պարտավորությունների չափը ենթակա է նվազեցման:

Քննարկվող դեպքում սոցիալական ապահովության վճարի գծով պարտավորություններն առաջացել են 2010 թ-ի փետրվարից մինչև 2011 թ-ի օգոստոս ամիսն ընկած ժամանակահատվածում, դրանք առաջացման օրվանից հաշվառվել են անհատ ձեռնարկատիրոջ անձնական հաշվի քարտում, հիմնավոր են և ենթակա են վճարման:

Ինչ վերաբերվում է գանգատում մատնանշված 20.000 դրամի չափով վարչական պատասխանատվության ենթարկելուն, ապա այդ կապակցությամբ հարկ է նշել, որ Ա/Ձ Արսեն Ղազարյանին վարչական տույժի ենթարկելու համար հիմք է հանդիսացել վերոգրյալ չկատարված պարտավորությունների առկայության հանգամանքը, որի համար «Վարչական իրավախախտումների վերաբերյալ» ՀՀ օրենսգրքի 170.3-րդ հոդվածի համաձայն նախատեսված է պատասխանատվություն:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

### ո Ր Ո Շ Ո Ւ Մ Է՝

ՀՀ ՖՆ իրավաբանական վարչության պետի 26.10.2015 թ-ի թիվ 1042/03 որոշմամբ գանձման առաջադրված պարտավորությունը նվազեցնել 19.195 դրամով՝ սահմանելով ընդամենը 55.025 դրամ, այդ թվում՝ ապառք 19.815 դրամ, տույժ 35.210 դրամ:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



ՎԱԿՈՐՈՒՄՅԱՆ